



EDITORIAL

Ibuksas ngan atuhan an natikagrabe nga militarisasyon ha Western Samar

Samtang natikapintas an militarisasyon ha Northern Samar, natikagrabe liwat an pasista nga pangatake han 8th Infantry Division ha kabaryuhan han Western Samar.

Ha sentral-weste, tikang Hunyo ginlalansar han Joint Task Force Storm han 8th ID an dako nga pan-kombat nga operasyon ha mga bungto han San Jose de Buan, San Jorge ngan Gandara. Masobra duha nga kusog-batalyon nga pwersa han militar ngan pulis an ginmobilisa agud mag-sulaysukay ha kagugub-an ngan umhanan. Ginsakop nira an mga baryo ngan ginbombahan an mga umhanan han masa. Duha nga retirado nga rebolusyunaryo an madarahug nira nga ginpatay. Ginpupugngan nira an pag-trabaho ha uma, ginkakawat ngan ginruruba an propyedad han mga parag-uma, ngan pwersahay nga nag-papasurender.

Samtang, ha sur-weste, nagpapadayon an panlasurbo han mga pasista

nga batalyon ilarum han 8th ID ha Calbiga, Pinabacdao ngan Hinabangan. Hadton 2018 pa nagtikang ini nga pauru-utro nga pagsakop nira ha mga baryo. Ginkakampuhan nira an mga *barangay hall*, ginpapangunahan an huruygo, ngan pwersahay nga ginpapagwardya an mga tanod samtang nag-iirignom hira. Waray kahumanan an pabalay-balay nga interogasyon ngan pan-gigipit ha mga upisyal han barangay. Ginbubuhag an mga asosasyon han parag-uma samtang gintutukod an mga kontrarebolusyunaryo nga organisasyon.

Hini nga pandarahug ngan pangabuso, hugot nga kabakyang han militar an mga traydor sugad kanda Freddie "Dory" Bolito ngan "Good" ha pagsaywar ngan panhadlok ha masa.

Antes hini, makapira kabeses na nagdeklara an 8th ID nga "nagluluya" na an rebolusyunaryo nga kagiusan ha rehiyon. Kun sugad, kay ano nga diri man nagluluya kundi natikapintas la an ira pasista-terorista nga gerra kontra ha BHB ngan masa?

An ungod, natikagrabe an pasismo tungod kay mas desperado an 8th ID nga puypuyon an katawhan ngan hukbo, nga nakatindog gihapon ha luyo han brutal nga todo-gerra, panalapas ha mga katungod, ngan natikahilarum nga krisis ngan kagutom.

Natikagrabe an pasismo tungod kay gin-aatuhan han katawhan an mga operasyon han pagmimina, pangalsada ngan mga pan-imprastruktura nga proyekto nga nanlulupot hin tuna ha mga parag-uma, nanruruba ha kalibungan, ngan surok han korapsyon han militar.

Labaw ha ngatanan, natikagrabe an pasismo tungod kay padayon nga ginpapasulong han katawhan an

Mga umhanan ha Western Samar, duha kabeses ginbomba han 8th ID

Ha sakob la hin tulo kasemana, diri mamenos ha duha kabeses ginbomba tikang ha kahanginan han terorista nga 8th Infantry Division an mga umhanan ha Western Samar.

Syahan ini nga nagpauran hin bomba hadton Hulyo 7 ha bawnderi han San Jose de Buan ngan San Jorge. Tikang alas-12 han kaagahon tubtub maglamrag, waray wantas nga ginbombahan ngan gin-istraping han FA-50 nga *fighter jet* ngan Super Tucano nga pan-atake nga edro an nasering nga lugar. Nagsarusaliwan la ini ha panganyon gamit an 105mm ngan 155mm *howitzer* ngan pagpalupad hin Hermes 900 nga *drone*. Hasta yana, mayda pa report han panganyon ha nasering nga lugar.

Utro nga nanmomba an 8th ID hadton Agosto 1 dapit alas-2 han kulop ha usa pa nga umhanan apiki ha Barangay Bay-ang, San Jorge. Diri mamenos ha unom nga bomba an

ginhulog han edro nga Super Tucano. Ginkukumpirma an mga report nga mayda mga parag-uma nga naigo dinhi.

Ginhimo an mga panmomba ha mga umhanan nga kadtuan han masa nga parag-uma ha lugar. Grabe nga kahadlok ngan peligro ha ira kinabuhi an gindurot hini nga pangatake ha apiki nga sibilyan nga komunidad. Samtang, ginlikaw ha publiko han numero uno nga pasista han 8th ID nga hi Major General Edgardo de Leon an ira

mga ginhimo nga terorista nga panmomba.

Ha lista han *Larab*, ini nga mga panmomba ha Western Samar amo an ikaduha ngan ikatulo nga kaso han terorista nga panmomba tikang ha kahanginan yana nga tuig ha rehiyon. Tikang 2019, siyam kabeses na nanmomba an 8th ID, gawas pa ha pangistraping ngan panganyon. ■



"Ibuksas...", tikang ha *paypay 1*

armado nga rebolusyon agud ibagsak an matiyupion ngan matalumpiguson nga naghahadi nga sistema.

Waray iba nga mahihimo an katawhan han Western Samar kundi pahugton an ira pagkaurusa ngan atuhan an pasista-terorista nga gerra han 8th ID. Kinahanglan nira ipanawagan nga palayason an pasista nga militar ha kabaryuhan.

Kinahanglan hira butukon han hukbo han katawhan para ha gitgitay nga pakig-away, ha paglansar hin dirudilain nga panmasa nga protesta para ha panginabuhin ngan katungod ngan pagpakyas ha pangatake han pasista nga militar, ngan ha paglansar hin mas agsub ngan sostenido nga mga taktikal nga opensiba kontra ha abusado nga mga sundalo. ■

Syahan nga anibersaryo han terorista nga panmomba ha Dolores, ginhandum

GINHANDUM HAN MGA rebolusyunaryo nga pwersa ha Eastern Visayas an syahan nga anibersaryo han terorista nga panmomba ha Dolores, Eastern Samar hadin Agosto 16.

Ha usa nga pahayag, utro nga ginpasidunggan han National Democratic Front-Eastern Visayas an 22 nga mga Pula nga mangaraway nga naghalad han ira kinabuhi ha walo kaoras nga *overkill* o sobra-sobra nga paggamit hin pandarahug han rehimen US-Duterte ngan 8th Infantry Division. Ginsaludaran liwat han NDF-EV an mga nahibilin nga kasama nga pursigido nga ginpapadayon an rebolusyunaryo nga kawsa han mga martir ha Dolores.

Ginkundenar naman hini an nagpapadayon nga pasista nga terorismo,

okupasyon militar ha mga baryo ngan natikamadarahug nga terorista nga panmomba, pangistraping ngan panganyon han 8th ID.

Nanawagan an NDF-EV ha katawhan nga ipanawagan an pagpaundang ha terorista nga panmomba han AFP. Nanawagan liwat ini han padayon nga paghatag pasidungog ha mga martir han Dolores pinaagi han hugot nga pagkatin ha mga leksyon ha terorista nga panmomba han estado.

Mababasa an bug-os nga pahayag han NDF-EV ha ispesyal nga isyu han *Larab*, Agosto 16, 2022. ■

Kagutom, kakurian han mga parag-uma, ginpapagrabe han 87th IB

Waray gud pagpaid ha natikagrabe nga kakurian ngan kagutom han masa nga parag-uma an pasista nga 87th Infantry Battalion han dirudiretso hini nga gipiton, paghadi-hadian, ngan pagrabihon an ira kakurian. Tagapagpatuman an pasista nga batalyon han pangawat, pagpugong ha pagpakabuhi ngan panringgal ha kinabuhi han mga parag-uma han mag-operasyon ini ha Western ngan Northern Samar, sigon ha mga report han Bagong Hukbong Bayan hadin Hulyo.

Ha Salvacion ngan iba pa nga sityo han Barangay San Nicolas, San Jose de Buan, Western Samar, gintutugutan la han mga sundalo nga magtrabaho an mga parag-uma ha mga umhanan nga 100 kametros an kahirayo tikang ha baryo. Bisan ini kun haros tanan nga umhanan han mga residente diri mamenos ha usa kakilometro an distansya ha ira komunidad. Ha esensya, pagpugong ini ha ira nga magtrabaho ha ira umhanan.

Gindidid-an liwat an mga residente nga humigda ha ira balay ha uma, bisan kun amo ini an ira kahiaraan tungod kay hirayo an mga umhanan ha ira balay ha baryo. Tubtub tulo kasalmonan la hin bugas an poyde nira dad-on tikang ha baryo ngadto ha uma. Diri poyde magbilin hin pagkaon, bisan asin, tungod kay kabaraka han mga sundalo, bangin igbilin ini para ha hukbo han katawhan.

Ginpupugngan na ngani an pagpakabuhi han mga parag-uma, gintamak-tamakan ngan ginruba pa an ira mga tanum han mga sundalo nga naabot ha kumpanya an kada kolum ngan naglugad ha ira mga umhanan. Inabot ha 200 nga pasista nga tropa an nakadeploy ha mga sityo han San Nicolas.

Ha Kilometro 7 han Barangay San Isidro, Las Navas, Northern Samar, apiki la ha Sitio Salvacion, hul-os na nga nagin kampo militar han mga tropa han 87th IB an

komunidad han mga minoriya nga Mamanwa nga gin-okuparan hini tikang pa hadton Mayo. Ginruba nira an mga purtahan ngan ginluhan hin *foxhole* an pira nga balay. Napiritan na liwat mag-ebakwet an mga residente han hirani nga Kilometro 3 ngan 4.

Nagpaabot hin reklamo an mga residente han Kilometro 7 ha meyor han Las Navas nga hi Arlito Tan agud igdemanda nga talwas hira nga makabalik ha ira lugar para man la panginanuon an mga nabayaan nga

umhanan ngan kahayupan.

Pagbalik nira, nahibaruan nira nga nagpatakas ha pangawat an mga tuyaw nga pasista. Usa nga guti nga tindahan an ira ginransak hin ₱10,000 nga balor han mga epektos. Han mahibaruan ini han tag-iya, nagreklamo hiya ha mga sundalo ngan dida la ginbaydan hin ₱3,000.

Waray nasalin ha ira mga inataman nga manok nga ginsura na o ginhimo na nga sumsuman han mga sundalo. Duha nga dagko nga baktin liwat an sering nira nga "nawara." "Ineskapo" kuno an usa samtang an usa nga anay, "nasakit" sanglit ginihaw na la. Ginpakita pa han sundalo ha tag-iya an bidyo han ira pag-ihaw. Waray bisan ano nga danyos-perwisyo nga ginhatag ha iya, bisan para ha mga pasi nga nagkamatay liwat. ■

Pangatake ha mga retirado nga rebolusyunaryo, natikagrabe

GINPATAY HAN 87th IB ngan han 1st ngan 2nd Samar Provincial Mobile Force Company han pulis an mag-asawa nga hira Rodrigo Mejica Lorezo (Ka Akag o Ka Kute), ngan Delia Rosco Rotalano (Ka Mema o Ka Kanay), ha Barangay Galutan, San Jose de Buan, Western Samar hadton Agosto 7. Diri ungod nga nagkamayda hin "engkwentro" giutan nira ngan han AFP-PNP. An tinuod, ginreyd hira subay ha estilo nga pag-"Tokhang" ha mga retirado nga rebolusyunaryo.

Usa ha mga pinakarespetado nga kumander han BHB ha Northern Samar hi Lorezo, samtang kilalado liwat nga kadre militar hi Rotalano. Hadton Pebrero 2020 hira nagretiro ha aktibo nga rebolusyunaryo nga buruhaton tungod ha kalagas ngan mga sakit. Nagbibinuwa an 87th IB ha pag-alegar nga may higtaas pa gihapon nga katungdanan an mag-asawa ha tuyo nga demoralisahan an hukbo ngan masa.

Gindakop naman han diri mamenos ha 15 nga sundalo hira Dondon Cabigayan, 33, iya bugto nga hi Ramy, 23,

ngan usa nga mag-asawa, ngatanan mga hadto anay kaapi han BHB, hadton Marso 10 ha Barangay Nabong, Pinabacdao, Western Samar dapit alas-6 han gab-i. Ginpapagawas nga mga "surenderi" an upat nga nag-aantos hin dirudilain nga pagpakuri ha kamot han militar, sanglit napipiritan nga sumunod ha mga kontra-katawhan nga mando.

Klaro nga panalapas ini ha tawha-non nga katungod. Dugang nga napapamatud-an nga diri ginkokonsidera han pasista nga rehimen komo sibilyan an mga retirado nga rebolusyunaryo. ■

"Lokal nga ertestorya pankamurayawan," tahub ha kurapsyon

(Syahan ha duha kaparte nga serye hiunong ha "lokal nga kamurayawan")

Waray igkasorpresa han Partido Komunista ng Pilipinas an rekomendasyon han National Task Force (NTF)-Elcac kan Ferdinand Marcos Jr. nga igsalikway an ertestorya pankamurayawan ha National Democratic Front of the Philippines, ngan igpadayon an "lokal nga ertestorya pankamurayawan," an daan nga palisiya ha kontra-insurhensiya han naglabay nga rehimen Duterte.

"Syempre igrekomenda han NTF-Elcac an 'lokal nga ertestorya pankamurayawan' tungod kay dinhi nakasarig an dako nga parte han nagbubuhi ha ira—an gintatawag nga 'barangay development program,'" sigon kan Marco Valbuena, tagapagayakan han PKP.

Labot ha tuyo nga buhagon an mga rebolusyunaryo nga pwersa, nagseserbe an "lokal nga ertestorya pankamurayawan" komo tahub ha saywar nga mga programa, sugad han barangay development program (BDP) ngan Enhanced Comprehensive Local Integration Program (E-CLIP).

An BDP gintatawag liwat nga *pork barrel* han militar. Tungod ini kay hira an nagdedesiyon kun ano nga baryo an tatagan hin tig-₱20 kamilyon ngan kun ano nga proyekto an popondohan. Haros ngatanan hini mga pan-imprastruktura nga proyekto sanglit nagseserbe nga dako nga surok han kurapsyon.

Ha Eastern Visayas, masobra ₱14 kamilyon pa la o 12% han kabug-usan nga ₱120-kamilyon nga pondo han BDP an nagagastos hadin Hunyo 8, masobra usa katuig tikang han igawas an pondo. Lupgop hini an 35 nga proyekto sugad han pangalsada, pagtindog han mga bilding, ngan panhatag hin treyning ha *livelihood*, para ha unom nga barangay nga gindeklara nga

"cleared" han 8th Infantry Division. Kun diri magagastos an nasasalin nga masobra ₱100 kamilyon ha katapusan han 2022, igbabalik ini ha National Treasury.

Amo nga sugad na la an paginapras han kumander han 8th ID nga hi Major General Edgardo de Leon nga "magastos" an salin nga pondo han BDP. Panalinguha liwat niya ini nga maaprubaran an pagsulod han dugang nga pondo ha masunod nga tuig.

"Suportado gud han mga upisyal militar, labina han mga aada ha balitang han dibisyon ngan batalyon, an 'lokalisado nga kamurayawan' tungod kay naghahatag wada ini para ha kita tikang ha mga kikkak ngan komisyon," paliwanag ni Valbuena.

Diri la an mga proyekto ilarum han BDP an gindadagmit komo hutuhan han kita nira de Leon ngan iba pa nga upisyal han 8th ID. Aada pa an iba nga mga pan-imprastruktura nga proyekto nga may kalabutan ha kontra-insurhensiya. Kalakip dinhi an ₱4.5-kamilyon nga "peace house" ("balay kamurayawan") ha sakob mismo han hedkwarters han 8th ID ha Catbalogan City, usa nga *training center* para kuno ha pagpahara ha *livelihood* ha Barangay Fatima, Hinabangan, Western Samar (nakada hini nga barangay an hedkwarters han 801st Infantry Brigade), ngan mga "peace village

("baryo kamurayawan") ha Pinabacdao ngan San Jose de Buan, ngaduha ha Western Samar.

Ha urhi, an waray kahumanan nga konstraksyon han mga kalsada ngan bilding waray gindudurot nga mahinungdanon nga pagbabag-o ha kinabuhi ngan pakabuhian han masa. Ginpaparaway naman han NTF-Elcac ini nga pira nga "showcase" nga proyekto komo nga "kadaugan" kontra ha BHB.

Usa pa nga atabay han kurapsyon an E-CLIP. Ilarum hini, gatus-gatos kayukot kapisos an ginsasaad nga "pahalipay" para ha mga "surenderi."

Ginpapapintas han NTF-Elcac an kampanya nga pagpasurender diri la para ha saywar ngan pag-uwat ha publiko, kundi para liwat magdamo an mga surenderi, magdako an igpapanhatag nga balor han "pabalay," "pakabuhian" ngan "ayuda," ngan magdako an mahuhuthot nga kita han 8th ID, iba pa nga upisyal-militar, RTF-Elcac, NTF-Elcac ngan iba pa nga alipures han pasista nga rehimen.

Ha Eastern Samar pa la, ₱6 kamilyon na an gin-aaro han gobernador nga hi Ben Evardone tikang ha upisina han presidente para kuno ha mga "masurender." Ginrarakudako niya ngan han 78th IB an usa nga "Ega" nga "nagsurender" ngan kinarawat kuno hin masobra ₱800,000—balor nga ginhatag ha iya masobra usa katuig pa kahuman niya igsurender an walo nga otomatiko nga riple.

Bisan kun ungod ini, hirayo kaupay an nakuha nga balor ni "Ega" kun igtatanding ha kadam-an han mga ginpirit ngan ginpagawas nga nagsurender nga waray nakarawat o gintagan la hin pira kaputos hin *noodles* ngan delata. ■

Mga panmasa nga organisasyon ha Pinabacdao, target han *red-tagging*

Gin-gigipit ngan ginre-*red tag* han mga sundalo nga naghihimo han operasyon nga Retooled Community Support Program (RCSP) an mga lehitimo nga panmasa nga organisasyon ha mga baryo han Pinabacdao, Western Samar.

Ha report han lokal nga manta-laan nga *Pasa Balita*, susrunod nga ginbutangan han gintig-ob nga pwera han Armed Forces of the Philippines ngan Philippine National Police-Special Action Force an mga barangay han Nabong, Mambog, Lale, Pahug ngan Madalunot. Diri mame-nos ha 50 nga tropa an nagpapatuman hin RCSP ngan nagdudurot hin kahadlok ngan karinggal ha mga molupyo, labina ha mga parag-uma nga prinsipal nga target han pangatake.

Ha waray kahumanan nga interogasyon ha mga residente ha tahub han "sensus," malisyoso nga ginpakianhan an mga molupyo kun ano nga mga organisasyon an ira gin-aapihan agud palutawon an organisasyon nga pauru-utro nira nga ginre-*red tag*. Kalakip dinhi an Samahang

Operasyon Sagip, usa nga *non-government organization* o NGO nga nanguna ha panhatag hin ayuda ngan dagmit nga pag-organisa ha mga nabiktima han superbago nga Yolanda hadton 2013. Agud makalikay ha pauru-utro nga pag-imbetiga ha ira han mga sundalo, napiritan an pira nga molupyo nga gumikan ha ira baryo.

Pirit liwat nga ginre-*red tag* an lehitimo nga asosasyon han mga parag-uma ngan ginpapagawas nga mga kaapi han BHB an kaapihan. Maisugon naman ini nga gindependahan han usa nga empleyado han reaksyunaryo nga gubyrno, nga nagsering nga rehistrado pa ngani ha Department of Labor and Employment o DOLE an organisasyon.

Samtang gin-gigipit an mga lehitimo nga organisasyon, nanrerek-

luta naman an militar ha CAFGU ngan *barangay intelligence network* ngan nagtutukod hin mga kontra-rebolusyunaryo nga organisasyon han kababayin-an ngan kabatan-unan. Hini nga mga katitirok, nagpapagawas hira hin mga salida nga nagpapakaraot han imahe han Bagong Hukbong Bayan. Nagseserbe naman an mga buwa nga asosasyon komo latayan han korapsyon han militar ilarum han mapan-uwat nga mga programa sugad han E-CLIP.

Kadungan han pan-gigipit ha mga panmasa nga organisasyon, ginhihimo liwat nga taming han mga sundalo an sibilyan nga komunidad. Ginkampuhan nira an *barangay hall* ngan gin-uripon an mga tanod agud mag-aga nga magwardya ha ira, mag-antos ha kaluyo han kapagal ha magkulop nga pag-uma, ngan ilubon an kapirawan imbes pumahuway nala. Sukwahi ha pahamot nga hira an tagseguro han "kami-ngawan," waray wantas hira nga nag-iirignom, naghuhuruygo ngan nagdudurot hin kasamok ha baryo. ■

Diri terorista hi Msgr. Cerbito!

USA NGA DAKO nga kalurungan an pagbansag han "Anti-Terrorism Council" (ATC) kan Msgr. Walter Alipio de Asis Cerbito ngan ha lima pa nga indibidwal komo mga "terorista."

Pinaagi han usa nga resolusyon nga ginpirmahan hini hadton Mayo 25 kundi gin-gawas ha publiko hadton Hunyo 15, malisyoso nga ginre-*red tag* han pasista nga konseho hira Msgr. Cerbito. Kalakip liwat ha listahan hi Ka Louie Jalandoni, kilalado nga negosyador han NDFP ha ertorya pankamurayawan ha reaksyunaryo nga gubyrno.

Usa hi Msgr. Cerbito ha natikada-

mo nga progresibo nga personahe ha Eastern Visayas nga gin-gigipit han estado gamit an Anti-Terror Law. Arbitraryo hira nga ginbabansagan nga "terorista" han ATC ngan ginta-tahapan nga dabi ha mga "terorista" mga aktibidad."

Diri terorista hi Msgr. Cerbito. Komo nagin hadto anay *vicar general* ngan namuno ha Social Action Center han *diocese* han Catarman, pira

kadekada niya nga ginpasulong an interes han masa nga parag-uma ngan anakbalhas ha Northern Samar, usa ha mga pinakakablas nga prubinsya nga diri naabutan han mga serbisyo han gubyrno.

Tungod ha pagbansag han ATC kanda Fr. Cerbito, mafi-freeze o pupugngan hira nga panginanuon an kada taga nira nga pinansyal nga pananagiya. Klaro nga gin-gagamit an ATL han pasista nga rehimen agud gipiton an mga progresibo nga indibidwal ngan organisasyon nga tinuod nga nagseserbe ha katawhan. ■

Pagsaludar

Geromino Romnick "Ka Gerry" Javier

Tagapagpadayon han armado nga rebolusyon

Kan-o man diri ini mabulag ha rebolusyon, papakamatyan ko ini." Ini an diri hingangalimtan nga mga puplunganon ni Kasamang Geronimo Romnick "Gerry" Javier ha usa nga saru-saruay ha igkasi niya parag-uma, antes hiya mamartir ha depensiba nga nahitabo hadton Mayo 16 ha Sityo Cag-anibong, Barangay Bagacay, Palapag, Northern Samar.

Natawo ngan dinako hi Kasamang Gerry ha nasering nga sityo. Tikang hiya ha kablas nga pamilya han mga pukaw nga parag-uma. Temprano hiya nga nailo ha amay nga ginpatay han pasista nga sundalo hadton 1992, ha panahon han usa nga Captain Billion. Ini nga panhitabo usa ha nagpahigmata ngan nagpahangkop ha iya ha rebolusyon. Nagdesisyon hi Ka Gerry nga magpultaym han tuig 2007 tubtub 2010. Nahideploy hiya ha sur-este han Samar hadton 2008.

Bisan kun pinahuway hiya komo kaapi han BHB, padayon nga nagpartisipar hi Ka Gerry ha mga rebolusyonaryo nga buruhaton komo kaapi han yunit milisya ngan Pambansang Katipunan ng Magbubukid (PKM). Resulta han iya pagin aktibo, narekluta hiya nga magin kaapi han Partido hadton 2014. Komo kaapi han PKM, aktibo ngan marayhak hiya nga nagpartisipar ha kampanya ha produksyon para ha pagkaon nga pankonsumo han ira panmasa nga organisasyon.

Hadin Pebrero, ginpailarum an lugar nira Ka Gerry ha grabe nga militarisasyon ilarum han Retooled Community Support Program (RCSP). Tungod ha presensya han militar, nakarag an mga anihon han mga paraguma. Ini an nagduso ha iya nga temporaryo nga kumadto ha lugar han iya asawa agud mamiling hin pakabuhi.

Kundi, dara han kakurian ngan padayon nga presyur han kaaway ha iya pamilya, sikreto nga inuli ha ira hi Ka Gerry ngan inaklop ha pultaym nga yunit han BHB.

Hadton alas-8:38 han aga han Mayo 16, han nag-iiskawting an usa nga tim han BHB diin kaupod hi Ka Gerry, nakaengkentro nira an may sobra 20 kadamo han pasista nga sundalo han 81st Division Reconnaissance Company. Maisugon nga ginatuhan ni Ka Gerry an kaaway agud depensahan an iya mga kasama ngan talwas nga makaalinggawas han ira posisyon.

Mabayanihon niya nga iginhalad an iya kinabuhi. Bisan kun nasamaran ha bitiis ngan ha sugbong, buhi pa hi Kasamang Gerry tubtub ha madismayo tungod ha punglo han ginbuhian nga M203 nga *grenade launcher* han kaaway. Gintutukan ngan ginpusil hiya ha ulo hin pira kabeses nga nagresulta ha kabuong han iya ulo ngan kamatayan. Pagpamatuod ini

han pagin unob nga pasista ngan mersenaryo han militar. Ha luyo nga bahin, duha nga pasista nga kaaway an napatay ni Ka Gerry ngan usa an nasamaran nga pirit nga gintago han 81st DRC pinaagi han sikreto nga paggawas hini han gab-i.

Sugad han iya tatay nga hi Geronimo "Ka Gerry" Javier Sr., han iya bata nga hi Edito "Ka Mario" Javier ngan iya patod nga hi Ka Jeric, ginpadayon ni Ka Gerry an diri mawawara nga tulin han mabayanihon nga paghalad han dugo ngan kinabuhi para ha rebolusyon. ■

